

Museo Numismático ta presenta exhibicion fotografico

ORANJESTAD (AAN): Pa prome biaha Museo Numismatico Aruba ta presenta un exhibicion fotografico. Esaki ta cuadra y ta encahá perfectamente den nos plan pa proyecta mas di Aruba riba nivel turistico.

Semper ta keda cu prioridad riba nos propio comunidad pero mientras nos ta educa y informa comunidad, por tambe na mesun momento, promove Aruba den diferente aspecto. Esaki ta momento pa probecha tur aspecto di Aruba cu nos ta orguyoso riba dje, nos paisahe, nos hendenan, nos idioma y nos historia.

Fundacion JMO ta haci diferente exposicion y exhibicion cu sosten maximal di Aruba su artistanan den diferente especialidad.

Fotografo Rosalie Klein: Cu solamente un fotografo e exhibicion aki ta promete di bira un exito rotondo y mester logra su proposito: Proteccion di diferente aspecto di nos isla combina cu arte y poesia como tambe promocion di e aspectonan aki riba nivel turistico. Esaki

ta motibo cu e plan ta worde skirbi tambe na idioma Ingles. Asina e instancianan concerni cu turismo por promove nos proyectonan directamente na bishitantenan, por ehempel atraves di nan website.

Exhibicion Fotografico: Lo presenta un exhibicion di un coleccion personal di fotografia saca pa Rosalie Klein. Lo exhibi e panorama di Aruba for di diferente angulo y horario manera subida y bahada di solo. Lo presenta tanto hende como tambe flora y fauna di Aruba.

Un exhibicion cu ningun hende por keda sin mira.

Lesamento di Poesia: Den e exhibicion di fotografia lo colga poster di algun poesia dedica na Aruba. E poesianan di Ruben Odor a ser escolhi, el a skirbi tanto poema den forma Indianismo como Arubanismo. Pa tardecer di apertura Ruben Odor lo recita algun di su bunita poesianan como tambe uno di e gran nacionalista di Julio Maduro*. Kadushi. Pa

completa e obra un grupo multi talentoso di hoben. The Truth Poets, lo presenta nan poesianan. Un evento cu lo proyecta un fantastico combinacion di poemanan di dos pa tres generacion.

Un tardecer fabuloso di fotografia y flama di poesia.

Focus special riba e hecho cu Rosalie Klein ta un dama Mericano cu ta biba pa 22 aña riba nos Isla mei mei di nos hendenan. Su amor y pasion pa Aruba ta grandi y e kier contribui di e forma aki pa promove y sostene Aruba atraves di un exhibicion. Mas despues lo publica mas destaye di Rosalie Klein den media local.

Proyecto 'Cultura atraves di Arte': Esaki ta un proyecto activo den plan di accion 2006-2010, cu Fundacion JM Odor a escohe como forma pa visualisa y promove Aruba su cultura y su hendenan, y ta cai bou maneho integral di Ministerio di Cultura.

Obhetivo di tur exposicion / exhibicion di Fundacion JM Odor:

(1) Promove Aruba riba

nivel turistico, dunando un sosten na e instancianan cu ta promove turismo y trata na traha un 'brug' entre turismo y cultura. Trata na saca mas informacion balioso na otro idioma Ingles ademas di Papiamentu pa asina cierto tradiconnan (Dande, Dera Gai) worde comprendi.

(2) door di promove nos propio cultura pa entre otro, sostene nos economia, na mes momento e ta duna mas empuhe pa proteccion di nos propio 'tesoronan'

(3) Pa medio di promocion, educa y informa publico general corectamente riba e topico escolhi.

Material di informacion ta concentra riba e exhibicion di fotografia y poema di Ruben Odor. Lo mantene un estructura simpel caminda e meta ta importante riba termino largo, e ta keda presenta pa seis luna. Un flyer na idioma Papiamentu y Ingles cu diseño grafico pa informa visualmente como textualmente riba e exhibicion. E coneccion cu Fundacion JM Odor ta haci cu ATA tambe ta yuda hopi

pa promove tipo di eventonan asina. Tambe lo skirbi diferente articulo combina cu foto y poesia pa media local na Papiamentu y Ingles.

Material di exhibicion ta keda limita na flyers y lista di prijs ya cu mayoria di fotografianan di Rosalie Klein ta na benta. E kier comparti su arte di saca potret cu mundo henter, sin kita afo cu esakinan atrobe lo bira promocion visual pa Aruba den exterior ora cu nan ser cumpra pa un bishitante. Sigur tin algun potret cu cualkier di nos cu ta biba na Aruba kier tin colga den nos oficina of cas. Pa termina Fundacion JM Odor kier gradici e gran poeta Ruben Odor pa duna Fundacion JM Odor e derecho di autor riba e buki 'Voz di mi Tera'.

Pueblo ta cordialmente invita pa bishita Museo Numismatico riba e apertura dia 15 di Juli 2006 pa 6.30 atardi of despues di e fecha aki diaramente entre 8 am y 1 pm libremente, sin cita, te cu 14 di December 2006.